

En conexion cu e di 20 Conferencia Bienal

SCL ta investiga idioma crioyo

ORANJESTAD – dia 5 te cu 8 di Augustus proximo e di 20 Conferencia Bienal di Society for Caribbean Linguistics (SCL) ta tuma luga. Esaki lo ta di dos bida cu Aruba lo ta escenario di e conferencia di SCL cu ta wordo organisa cada dos aña. SCL ta un sociedad academico cu ta studia idioma den Caribe.

Na 1980, bou di vice-presidencia di Ramon Todd Dandaré Mag. Ling., a tene e

conferencia linguistico internacional di SCL na nos isla.

Fundacion Lanta Papiamento (FLP), Biblioteca Nacional Aruba (BNA), Instituto Pedagogico (IPA) y Departamento di Cultura Aruba (DCA) ta anfitrion di e evento aki. Nan ta trahando duro pa realisa e proyecto grandi, hunto cu otro instancia local manera, Departamento di Enseñansa, Universidad di Aruba, Grupo Corector di Papiamento y Fundacion Bon Nochi

Drumi Dushi.

Kico ta SCL?

Society for Caribbean Linguistics (SCL) ta un sociedad academico linguistico cu ta studia idioma den Caribe. E sociedad ta publica tur e resultadonan di e investigacionnan cu e ta haci riba tereno di idioma crioyo. SCL a cuminsa cu su trabounan na fin di decada 60.

Na 1968 tabatin e Conferencia Linguistico Crioyo na Mona Campus di e Univer-

sidad di West Indies na Jamaica.

Durante e conferencia aki a lanta SCL. Cuater aña despues na Trinidad & Tobago SCL a keda formalmente estableci y na 1976 SCL a tene su prome conferencia internacional na Universidad di Guyana. Desde e tempo ey SCL ta tene un conferencia cada dos aña na un pais diferente den Caribe.

E prome presidente di SCL tabata profesor Frederic Gomes Cassidy di Jamaica



kende a biba gran parti di su bida na Merca (1907 – 2000). E linguista Arubiano Ramon Todd Dandaré tabata vicepresidente di e sociedad aki na 1980. Dos aña despues el a bira presidente di SCL. □